



Da buna speranza per la votaziun Gieus olimpics 2026 en il Grischun: Jörg Domenig, mainagestiu Hotellerieuisse Grischun; Andreas Züllig, president Hotellerieuisse Svizra ed Ernst Wyrsch, president Hotellerieuisse Grischun (da san.).

«La qualidad, quella constat»

Arosa: Radunanza da Hotellerieuisse Grischun

DA GION NUTEGN STGIER / ANR

■ **A la hotellaria mancan persunas qualifitgadas, las plattafurmas per reservaziuns fan er quitads als hoteliers, ils hotels grischuns tutgan en Svizra tar ils megliers ed ils Gieus olimpics 2026 en il Grischun èn per ils hoteliers ina perspectiva per l'avegnir. Quai èn las lingias grassas da la 98avla radunanza.** Ina giada dapli è s'inscuntrada ina societad illustra cun blers giasts da la politica, da l'economia, dal turissem e da la hotellaria a la radunanza annuala da Hotellerieuisse Grischun ad Arosa. La davosa giada haja Arosa puschì tetg als hoteliers grischuns il 2009. Dapi lura saja sa midà bler èn la hotellaria, ha ditg *Ernst Wyrsch*, dapi quatter onns president da l'organisaziun tetgala dals hoteliers grischuns. Da lez temp faschevan ils hotels en noss chantun anc bunamain set milliuns pernottaziuns e da preschent sajan quai anc 4,7 milliuns pernottaziuns.

Set hotels grischuns tranter ils top diesch

La gronda part dals ustiers e hoteliers presta mintga di fitg buna lavur. Per qualidad saja il giast anc adina pront da pagar in bun pretsch e la qualidad, quella saja avant maun tar hotels e hoteliers, cun intginas excepziuns, ha ditg *Wyrsch*.

Quai conferma er che tar il portal da vadi «Holidaycheck» figuran da 50 hotels svizzers gist set hotels grischuns tranter ils top diesch, ha punctuà il president dals hoteliers da noss chantun. Cun il Waldhaus Segl ed il Schweizerhof Lai èn schizunt dus hotels grischuns a la testa dal «ranking». Ina realitad è lura che oz stat in giast en media be pli 2,8 dis en in hotel, persunter va el pli savens, dentant adina puspè en in auter lieu ed hotel. Tar la derivanza dals giasts en ils hotels grischuns derivan 59% da la Svizra, 19% da la Germania ed ils auters dad auters pajais.

Ils temps da lavur irregulars

Ils portals da reservaziun sco per exempel «Booking» sajan oz in puschida supplementara, dentant ina buna atgna pagina dad internet saja segir anc la meglra soluziun per far ina reservaziun en l'hotel. Ils portals da reservaziun porschan bain ina plattafurma fitg vasta, da l'autra vart caseschan las organizaziuns summas grondas sco cumissiuin. Ina realitad saja che a la gastronomia e hotellaria manchian persunas dal rom ed emploiads qualifitgads cun ina buna scolaziun. La raschun che adina pli paucs mats e mattas fettschian in emprendissadi en la gastronomia sajan cunzunt ils temps da lavur irregulars, lura er la lavur da sonda e du-

mengia, ha menziunà *Wyrsch*. Eran il 2008 anc 260 mats e mattas sa decidids da far in emprendissadi da cuschinunz èn quai stads l'onn passà 160 del.

Il contact tar la politica è bun

Tant *Ernst Wyrsch* sco er *Andreas Züllig*, il president dals hoteliers svizzers, han ditg ch'il contact tar las instanzas politicas e tar ils uffizis d'economia e turissem sajan buns. La collavuraziun funcziunia, quai che pertutga meglras cundiziuns da basa saja segir anc avant maun in tschert basegn, cunzunt tar la taglia sin la plivalur. *Wyrsch* e *Züllig*, omadus han animà da s'engaschar per l'iniziativa per pretschs pli fairs, lantschada da Hotellerieuisse.

Gieus olimpics 2026 in grond tema

Tema central da la 98avla radunanza da Hotellerieuisse Grischun èn stads ils Gieus olimpics en il Grischun. *Wyrsch* ha ditg che cun quel project savessia al Grischun finalmain gartegiar ina gronda frida che saja er necessaria per sa preschentar in il mund global. Ultra da quai pussibiliteschia quel project er a las 150 vals grischunas da realisar en cuminanza ina gronda occurrenza internaziunala. Ils Gieus olimpics 2026 en il Grischun sajan per ils hoteliers da noss chantun ina perspectiva per l'avegnir e lura er ina raschun da far investiziuns e dad esser innovativs.



Cusseglier guvernativ Jon Domenic Parolini cun Bettina Schlumpf, cusseglia dra per firmas.



Martin Vincenz, il director da Grischun Vacanzas, cun Ariane Ehrat, la directura da Turissem San Murezzan Engiadina.



Andreas Wieland è er fiu e flomma per il project Gieus olimpics 2026 en il Grischun.



Dus directurs da pendicularas: Sivio Schmid, Sedrun, e Philipp Hollenstein, Arosa (da san.).



Alois Vinzens, il director da la Banca chantunala, cun Eugen Arpagaus da l'uffizi d'economia e turissem (da san.).



Hoteliers cun corp ed olma: Adrian K. Müller e Jörg Degiacomi (da san.). FOTOS G. N. STGIER